

皇  
明  
詔  
令

皇明詔令卷之十六

憲宗純皇帝下

茶課勅 成化七年五月十七日

勅巡視民瘼南京戶部右侍郎黃深并巡按監察御史都司布政司按察司以茶易馬係洪武永樂正統宣德年間已行事例後因邊方多事暫且停止近該陝西巡撫等官奏稱彼處缺馬數多乞要舉行前例勅至爾等即便會鎮守太監梅忠從公計議將保寧等府歲辦茶課照依元年原定則例該茶八十四萬三千

六十斤設法陸續起解各司委官一員督令  
各該所屬委官起倩軍夫管運至四川陝西  
接界官司收納務要足備仍須處置亭當不  
許因而騷擾下人爾其欽承毋怠故勅

却群臣表請立東宮勅 成化七年七月

二十一日

皇帝勅諭文武群臣覽表具悉君國建儲理所當然  
朕豈不亮卿等至情第以儲副國本所係欲  
俟年齡既長俾進學成德然後正名為當今  
之所請未可允從

乞請立東宮令禮部具儀勅 成化七年

七月二十二日

皇帝勅諭文武群臣覽表具悉卿等再三以建儲為  
言詞明理正援引切當忠愛至矣欽承

皇太后聖訓亦謂茲事重大宜從衆望不可固拒今  
特允所請其令禮部具儀擇日以聞

脩舉預備四倉勅 成化七年八月十五

日

洪武年間每州縣各設預備四倉所以廣儲  
畜備旱勞暑在令典民咸賴之比年所司因

循廢弛視爲虛文是以一遇饑荒民無仰給  
今特命爾等修舉預備之政勅至爾布政司  
按察司掌印官即督同各府州縣正官將原  
設四倉查勘有無見在糧數若干多寡除見  
有外應該添糧若干先儘各處在官贓罰等  
項錢糧支給收納及令囚犯照例納米贖罪  
如有不敷或於存留糧內借撥或於各里上  
中戶稅糧內米正糧一碩另勸米麥共五升  
或有可行從宜區處如里分用糧數多原設  
倉廩不敷收貯亦須量爲添蓋遇饑荒照例

賑給秋成之日抵斗還官如連年豐稔倉糧亦須易新勿令腐爛其看倉大户老人於附近里分僉點殷實有行止之人充當不許濫設敢有不行用心看管有通同官吏插和糠粃沙土實收虛放侵欺作弊使小民不受實惠者爾等就行拿問治以重罪其軍衛屯所原設有預備倉爾都布二司掌印官一體督同衛所正官并屯田官員照例整理爾三司并府州縣衛所該管官員務要邇相督率十分用心從長區畫三年之內務臻實効不許

仍前怠慢虛應故事如違許巡按御史通行  
糾舉應拿問者就便拿問應奏請者參奏究  
治爾等每遇歲終將收過倉糧數目從實奏  
報毋或稽遲故勅

冊立東宮詔 成化七年十一月十六日

奉

承運

皇帝詔曰自古帝王君臨海宇必崇建元良以爲儲  
副此久安長治之道也惟我

祖宗列聖允迪大猷承傳有序邦本旣固鴻業斯隆

暨朕嗣守丕圖于茲八載彛章未舉蓋有待  
焉長子祐極天資明粹日表英奇中和之性  
夙成內外之心是屬比者公侯駙馬伯文武  
群臣合誠奉表請建東宮恭承

皇太后聖訓茲事重大宜從衆議爰以令辰舉行彛  
典授祐極以冊寶立爲皇太子正位東宮用  
篤邦家之祐衍

宗社無疆之休大禮既成輿情交慶宜敷霽澤覃被  
萬方所有合行事宜條示于後

一自成化七年十一月十六日以前官吏軍民



人等有犯除謀反大逆謀叛子孫殺祖父母  
父母真妾殺夫奴婢殺主蠱毒魘魅毒藥殺  
人強盜人命妖言不赦外其餘已發覺未發  
覺已結正未結正罪無大小咸赦除之敢有  
以赦前事相告言者以其罪罪之

一文武官吏監生知印承差生員軍民人等有  
爲事見發運磚運炭運灰納米及追罰馬疋  
做工擺站煎鹽炒鐵充軍伴儀從膳夫等項  
悉宥其罪各還職役寧家隨住軍職例該帶  
俸差操者照原擬發落文職官吏人等有貪

淫者悉發原籍爲民

一軍官旗軍將軍力士校尉舍人餘丁有爲事發遣各處立功哨瞭者盡行放免復還職役例該帶俸差操者不許管軍管事

一各處拖欠未徵稅糧馬草子粒農桑絹布井戶口食鹽鈔錠商稅河泊門攤課鈔差發銀兩自成化五年十二月以前盡行蠲免今歲奏報災傷去處曾經勘實者糧草子粒悉與除豁

一直隸通州左等衛採運荻青草束軍士逃故

數多無人撥補名下拖欠草束者自成化六年以前盡行蠲免今歲京衛軍士該採草束者被災無從採打曾經奏告到部者蠲免三分

一各處鹽場有因雨水損壞倉廩消化鹽鈔曾經風憲官踏勘明白者盡行蠲免其成化六年有因災傷無力煎辦曾經奏報勘實者該辦鹽課以十分爲率減免三分

一成化六年以前各處歲造紵絲紗羅綾緞曾經起解該庫驗退加倍追賠已織完者照數

起解未完者止追正數餘悉蠲免其被災去處  
遍年拖欠歲辦皮張魚油翎鰓折納麻鐵  
暫且停止

一各年逃軍逃匠逃囚人等自詔書到日為始  
限三箇月以裏赴所在官司看告與免其罪  
軍還原伍匠仍當匠民放寧家其各處解軍  
之人有因問發遠限充軍者放回寧家後不  
為例

一自成化七年十一月十六日以前内外文武  
官員總小旗有停罷俸糧者詔書到日為始

照舊開支比直隸連年災傷儒學黜退生員見追廩米悉皆宥免

一荆襄等處流民除已發遣回原籍者有司加意撫恤優免糧差五年其間或有逃匿山林拒捕不出者詔書到日許令出首令還原籍一體存恤優免

一陝西延綏地方連年被盜賊驚擾人民艱難今歲該徵糧草暫行寬免見任隨住官員每人賞銀二兩以酬其勞

一光祿寺廚役年老殘疾者告官審驗是實該

回寧家有司照缺僉補上林苑監原僉養牲  
種菜人戶其有老疾不堪應役戶內無丁頂  
補者許該監官驗實具奏放回原籍隨住  
一各處官軍騎操馬疋自成化七年十一月十  
六日以前一應倒死已報在官者悉皆蠲免  
虧欠馬駒四疋折買一疋其先次查出漏報  
不買者不在此例

一各王府官員九年考滿照例給與該得誥命  
其方面知府在邊効勞不得赴部給由九年  
考滿一體授與該得誥命

一各處倉官及收糧經歷守候二年之上放支不盡者仍聽全支本等俸給

一今後三考滿吏典從吏部陸續考試不必會官仍照三等例行聽選監生不願出仕者與從七品散官閑住

一軍民中有鰥寡孤獨者所司依例存恤毋令失所

一軍民有男婦年八十以上者詔書到日所司仍給絹一疋綿一斤米一石

一天下軍民利病許諸人直言無隱

一前項寬恤事宜務在遵行不許違慢

一一應管軍管民官員俱要守法奉公撫恤下  
人非奉朝廷明文不許纖毫科擾違者罪之  
於戲元良正位綿大統於萬年曠蕩推恩均至  
仁於四海詔諭遐邇咸使聞知

星變修省勅

成化七年十二月初七

旨

朕以涼德祗紹鴻圖敬

天動民罔敢或怠所異臻于治理用召嘉祥乃者彗  
見天東光芒西指仰觀玄象祗懼實深俯自



省修罔知厥咎豈朕步道尚淺燭理未明而  
刑政之不善與抑用人有未當而賢否混淆  
與聽言有不察而是非乖舛與將用度奢侈  
賞賜無節妄費府庫之財與營繕頻繁徵科  
無藝致傷軍民之心與有一于此悉朕之過  
方圖齊沐告

天改過脩德以消變異而爾文武群臣皆居官食祿  
以輔朕者何不痛自脩省與其有背公徇私  
怠廢政事宜速改勵以脩庶政以匡朕之不  
逮凡時政得失生民利病有可張弛興革者

爾文武大臣并科道公同會議停當條舉  
以聞務在實可行庶幾君臣上下同心協  
德盡交修之道則人心悅而  
天意回美勉之懼之故諭

諭山東撫按三司彌盜勅 成化八年

正月二十九日

勅山東巡撫巡按三司朕惟為政莫先於安民安民

莫要於弭盜盜賊竊發必有所由所司旣  
不能加意撫恤消患於未然又不能及時  
緝捕弭患於已發甚隱弊不言坐視民患

此豈朝廷設官為民之意勅至爾等宜思  
患預防用心撫恤軍民巡邏盜賊仍令三  
司守巡官各照地方常行巡撫不許因循  
在家偷安遇有盜賊生殺督令軍快人等  
設法撲捕或密切擒拏務在盡絕毋令滋  
蔓仍戒約軍衛有司原委應捕人員不許  
生事妄指平民圖財取物因而激變若所  
管地方盜賊成羣劫掠一月以裏不獲者  
聽爾等就將守巡并巡捕官員拏獲盡絕  
照舊支俸管事倘嘯聚成羣事重者爾一

面設法撲捕一面星馳具奏處置毋或因循怠忽自取罪愆敢有隱蔽不言釀成大患者聽爾等訪拏究治且民窮為盜理勢必然近來有司剝削民財非<sub>止</sub>一端或指修公廨陰肆漁取或妄加人罪公行罰贖或假行均徭因而侵剋名雖為公實則利己民之窮困大抵由此爾等尤宜嚴加戒約令洗心改過不許仍蹈前非違者治以重罪不宥蓋侵漁之患既止則刼掠之盜賊息矣爾等其思之故勅

賑恤京畿山東河南詔 成化九年四

月十七日

皇帝詔曰朕紹

祖宗鴻業為天下生民主夙夜憂勤用圖康濟柰  
近年以來旱澇相繼歲數不登加以今春  
亢旱為甚京畿州縣被傷者多山東濟南  
等府六府河南彰德一府災傷尤甚人民  
缺食十常八九守臣以告朕心惻然夫民  
生不遂實司牧之過如又坐視其飢寒窮  
困而不顧豈為民父母之道哉用是發倉

儲出幣藏弘敷寬恤之仁未慰黎庶之望  
凡爾居官食祿為朕牧民者務加意賑恤  
毋生事煩擾仍諭居民隣里相救有無相  
通共濟難厄以候秋成有積者毋閉糴自  
私垂救急之義窮乏者毋流移轉展放縱  
非為以重害爾生於戲憂民之憂朕心良  
切故茲詔示咸使聞知計開所有寬恤事  
宜條示于後

一被災傷之處成化九年夏稅小麥絲綿絹  
疋戶口鹽鈔山東六府并順德廣平彰德

三府盡行蠲免順天河間真定大名四府免五分保定一府免二分所屬州縣中間災有輕重宜從巡按官酌量施行其秋糧馬草并衛所屯種籽粒待秋成具實奏報處置

一前項司府通年逃民拖欠稅糧等項及見在人民陪納者自成化六年十二月以前俱免追徵

一山東長蘆鹽運司被災去處今年該徵鹽課山東減五分長蘆減三分

一前項司府衛所被災去處一應寄養孳牧  
騎操馬騾驢牛自成化九年四月以前倒  
死虧欠被盜等項已報在官例該追賠并  
原次停止折買未完者盡行蠲免如已徵  
價直在官不在此例其走失被盜馬匹日  
後得獲照舊還官

一前件災傷去處清出各衛所逃故等項軍  
士除原逃正身起解外其查理查補暫且  
停止候豐年起解

一真定大名二府成化九年派買猪羊雞隻



價銀未起解者盡行蠲免

一山東成化九年歲辦段疋皮張翎鰓悉皆蠲免

一成化九年砍柴人夫山東順天保定真定三府先已通減三分其餘除起解外山東夏秋二季未起人夫悉皆停免順天保定真定三府二季內量減二分工部神木敝苦蓋木植人夫以十分為率存留四分看守其餘放免以甦民困

一前項被災去處官吏軍民有為事曾經法

司問斷回還原籍官司追賠錢糧贓物紙鈔未完者俱免追納錢糧馬草等項人戶有被攬頭坑陷或遇水火盜賊事有顯跡已告在官又拘家屬名下重追賠納者即與分豁

一前項被災地方逃軍逃匠逃囚人等自詔書到日限一月以裏首官免罪各還寧家其有為事被提逃避山林者許於所在官司首告真犯死罪該管官司查審明白奏聞定奪其餘宥免

一累撥京庫銀兩并各處倉糧賑濟缺食軍民巡撫務要着司府州縣分投驗實放散不許遲悞凡一應在官工役不急之務俱暫停止毋或勞擾

諭三法司勅

成化九年九月十七日

皇帝勅諭刑部都察院大理寺朕惟古者刑以弼教罰以止罰非欲設此以戕人之生我朝斟酌古今製為刑律至精至密永為令典近者法司多不遵守聽訟之際鹵莽滅裂推鞫不明或擬罪之間觀望逢迎比附不

當或因賄賂而妄行出入或因喜怒而恣  
為重輕或羅織以陷人於寃或鍛鍊以置  
人於死視法度為等閑以人命為草芥致  
使人心嗟怨陰陽愆和自今法司大小官  
員各宜痛加警修遵舜典欽恤之言體周  
書敬慎之意於情之可矜可疑者各與辨  
折於人之有寃有抑者必與申理務使處  
斷得中人心允愜庶副朕付托之重不然  
以深刻為功以苛暴為能刑罰枉濫無辜  
受害則國有法罪將焉追爾等其戒之慎

之故諭

再開立 東宮詔 成化十一年十一

月初八日

皇帝詔曰帝王誕膺景命必建儲闢所以重

宗社之承正邦家之本此古今通制也朕續承丕

緒祗懷求圖旰食宵衣不遑自逸允惟也

罔之主實繫臣民之心庸舉盛儀以慰群

望

皇太子祐樞聰明天賦睿智夙成孝本因心禮皆

中度朕遠稽古昔近法

祖宗覽群臣請建之章奉

祖母從衆之訓遂授冊寶立祐檣爲太子正位東宮  
衍寶祚於萬年隆本支於百世弘施慶澤覃  
被寰區所有合行事宜條示于後

一自成化十一年十一月初八日昧爽以前官  
吏軍民人等有犯除謀反大逆謀叛子孫謀  
殺祖父母父母妻妾殺夫奴婢殺主蠱毒魘  
魅毒藥殺人強盜人命及文職官有犯賊罪  
不赦外其餘已發覺未發覺已結正未結正  
罪無大小咸赦除之敢有以赦前事相告言

者以其罪罪之

一文武官吏監生知印承差生員軍民人等有  
爲事發運磚運灰運炭納米拘役枷號罰馬  
做工擺站煎鹽炒鐵充軍伴膳夫斗級等項  
悉皆宥其罪各還職役寧家軍職例該帶俸  
者照原擬發落文職官吏人等有犯貪淫者  
悉發原籍爲民

一各處織造紵絲紗羅綾紬等項除額辦歲造  
并工部奏派之數照舊解運外其餘蘇杭嘉  
湖并應天府等處差人坐守織造者悉皆停

免已織完者照數起解未完者并已徵物錢  
交與所在官司准作織造內支用差去內外  
人員即便回京違者罪之

一自天順八年正月以後官吏監生承差人等  
爲事充軍例該止終本身及問發口外爲民  
者所司查勘明白放回原衛原籍爲民隨住  
一在外鎮守守備內外等官近年假以進貢爲  
名僉取民間阜隸出辦銀兩貽害地方今後  
不許額外進貢沿途擾害軍民阜隸革罷  
一各處軍解領批違限一年之上例該充軍者



悉宥其罪照舊起解再違者仍發充軍

一近年軍民舍餘人等有例許於陝西山西河南等處納粟與做軍職就住彼處衛所支俸一石果有經隔原籍路遠者聽其告改附近衛所以足邊儲

一兩廣雲南貴州福建去處武職子孫有因人文不帶俸者悉照原擬發落文職官吏人等有犯貪淫發原籍爲民

一軍官旗軍將軍力士校尉舍人有爲事遣各處立功哨瞭盡行放免復還職役照例帶俸

不許帶軍管事

一各處逃軍逃匠逃囚人等詔書到日限三箇月以裏赴所在官司首告與免本罪軍還原伍匠仍當匠民放寧家輪班人匠有罰工者免罰工止當正班在京各營遠年及近逃官軍許令出首免問送營收操

一在京各營在外各邊各處軍衛有司原養寄養騎操孳牧走遞馬驢并種馬自成化十年十二月以前一應倒失虧欠之數盡行蠲免

一河南山東陝西等處流民多有逃往湖廣荆

襄等處深山藏住詔書到日悉聽各回原籍  
沿途官司量給口糧所司務加存恤優兌糧  
差三年公私債負不許追取湖廣貴州等處  
苗蠻多因所司失於撫字及因貧窮所迫不  
得已相聚為盜詔書到日許令改過自新各  
還本土安生樂業若不改悔仍前聚集為非  
聽總兵等官征勦

一內外交武官員總小旗有停罷俸糧者詔書  
到日照舊關支今後各處倉官及收糧經歷  
守候二年之上放支不盡仍聽全支本等俸

給

一各處該納稅納馬草子粒農桑人丁口食  
鹽門攤商稅魚課棗株諸色課程鈔貫除已  
徵在官外其小民拖欠未徵者自成化九年  
十二月以前悉免今歲奏報災傷去處即行  
勘實糧草子粒悉與除豁各鹽運司提舉司  
自成化八年以前該辦鹽課拖欠未完者亦  
與除豁其被淹沒鹽場曾經風憲官勘實者  
俱免追賠山東并順天等八府軍民先因飢  
荒關過賑濟倉糧悉免追賠

一內外法司凡有累訴冤枉中間事情可辯者  
所司悉與從公辯理其強盜人命有賊仗欠  
明情可矜疑者奏聞區處

一文武官吏監生人等自成化元年正月以後  
有爲事問發充軍及編發爲民者除黨逆強  
盜搶奪人命失機誣告十人以上貪淫酷暴  
不宥外其餘悉放寧家隨住有奉特旨差遣  
者所司具奏定奪

一兩廣等處軍民田土先年被賊蹂踐占種及  
各處水衝沙壓不堪耕種田土曾經官司結

勘明白通年拖欠稅糧并逃民拋荒田土遺  
下糧草累及見在人戶賠納不全者自成化  
十年以前悉與除豁通州左等衛軍士採運  
并京衛該採荻青草束今歲被水滄沒採打  
不敷曾經奏告到部以十分爲率減免三分  
各處倉場先年有司失火延燒糧草等項經  
該官攢斗庫人等已經問發追賠未完者悉  
免追賠若故燒者不在此例

一給由考滿該陞及冠帶未任聽選官員有家  
貧親老疾病等項原告致仕者授以應該陞

除職名以榮終身監生有不願出仕者授以正八品有司職名俱令冠帶開仕原籍官司以禮相待免其雜泛差役吏典遇例告愿納草納米未會上納例該重歷者免其重歷已發重歷悉還衙門辦事其南京各衙門三考後滿者免其赴京宜從南京吏部照例考試中試就彼冠帶辦事不中者徑發爲民

一各處義官義民已經給與散官冠帶榮身立石旌異等項近該在外問刑衙門不論所犯輕重俱革冠帶追奪有華旌勸之意今後除

重罪外其餘徒流以下不問已結正未結正  
止許各依所犯科罪不在除名追奪之限  
一易州等處山場自成化十一年十一月以前  
一應坐派柴炭除見有領運外若廠無收積  
徵價買辦果原領價少賠補不敷及分派在  
廠採燒年久拖欠不曾徵有官價者所司通  
勘明白即與分豁有被人包攬誑騙跟捉不  
獲曾經具奏者仍令原解賠納該部另項收  
貯其成化十二年內外各衙門坐派柴炭以  
十分爲率減二分照數減徵腳價以蘇民困



在京各衛拖欠柴炭自成化八年十二月以前盡行蠲免

一成化十年十二月以前各處軍衛有司歲造軍器弓箭弦條歲辦皮翎野味及內外衙門買辦採辦葛稽荆條蒲草蘆蓆穰苗馬連根等項拖欠未完者悉與寬免已徵物料在官者准作下年該收之數其起解麻鐵竹木堆垛樁草遭風漂流被火燒毀曾經奏告查勘是實者免其追賠

一凡民年八十以上者免一丁差役有司每歲

給與綿二斤布二疋九十以上者給與冠帶  
鰥寡孤獨無所倚者有司量加存恤

一公侯駙馬伯子孫務要讀書習禮各訪通經  
儒士一人送吏部考試取中准令教書三年  
滿日照例授職事仍舊教書

一天下軍民利病許諸人直言無隱

於戲正元良之位式副輿情推曠蕩之恩用敷博  
愛詔告天下咸使聞知

追復 景皇帝謚號初成化十一年十二月

十三日

卷之六  
二十  
曩者朕

叔邸王踐祚戡難保邦奠安

宗社亦既有年及寢疾臨薨之際奸臣貪功生事妄  
興讒構請去帝號

先帝尋知誣枉深懷悔恨以次抵奸于法不幸上賓  
未及舉正朕嗣大業于茲一紀每思先儒有  
言祖父有欲爲之志而未爲子孫善繼志  
而成就之此所謂孝間以帝號之復質請  
聖母皇太后亦云此

上  
帝本意宜即舉行祇服

慈訓敦念親親誕告在廷用成

先志其

郕王可仍舊皇帝之號所有

尊謚禮部會議以聞務合人心毋乖典禮仍令所  
司脩飭陵寢如勅奉行故諭

景皇帝追復謚號賜宗室書

附

成化十一年

十二月二十四日

皇帝奉書

叔祖周王茲者體

皇考之素心採廷臣之公議今月二十四日上

叔鄴王尊謚曰

恭仁康定景皇帝所以敦親親之恩正風化之本也

專書奉報惟

叔祖亮之

修武備初成化十三年七月十四日一

朕惟武備所以折衝禦侮衛國保民自古有  
國家者莫不恃此以安茲者各處地方災異  
迭見加以戎虜逼近邊陲防危慮患此正其  
時勅至爾等即便會同巡按三司等官從長  
計議彼處彌盜安民之術選將練兵之方與

凡可以裨補軍機重務者逐一條陳以聞務  
在鑒鑒可行不許泛泛不切爾等其欽遵之  
故諭

諭鄭陽巡撫官劾

成化十五年六

月二十一日

皇帝勅諭大理寺右少卿吳道宏新設湖廣行都司  
勛陽府并荊州襄陽河南南陽陝西漢中西  
安七府所屬州縣與勛陽接境四十餘處地  
土廣闊山川深險先年各處流民已該都御  
史等官審勘其應附籍編入版籍者已令爾

提督典牧之官用心撫禁但近年山東河南  
荒歉又恐饑民潛來赴食嘯聚爭奪勢所必  
有雖有三省撫巡等官平時會議往返動經  
月餘若一旦有事何以克濟守土等官合詞  
來聞特陞爾前職仍與勛陽府住劄專一往  
來前項地方巡察奸貪撫安人民整飭兵備  
區畫糧儲提督各該司府撫治流民官員修  
理城池禁防賊盜作與學校清理刑獄使編  
籍居民各安生業仍時常省諭軍民人等不  
許收藏應禁之書及捏造妖言冒干刑憲罪

及身家事有應與分守太監希貴會議者須  
公同計議而行不許偏執悞事倘遇草寇生  
發即便公同希貴量調所部官軍民快上緊  
撲滅毋或坐視致賊滋蔓地方其有應與各  
該鎮守巡撫等官會議者須從公議行凡所  
司府軍衛有司官員人等有犯應拿問者究  
治如律應奏聞者奏聞區處爾受茲重託尤  
須持廉秉公正已率下務使軍民得所地方  
寧靜斯為爾能不許輕率處事乖方致民嗟  
怨有壞地方罪有所歸爾其勉之慎之故諭



取木料

成化十六年二月初一日

勅內官監左少監高通今因蓋造城樓等項缺少木料特命爾往湖廣荊州等直隸太平府蕪湖縣二抽分廠會同該巡按三司等官并工部原委官員將見在廠并以後新抽一應木植板枋聽從爾并差去工部郎中項文泰公同查盤見數揀選堪中者委的當官員設法起解立限赴京內除蕪湖縣止將見抽堪中起運其餘缺少彎曲并松木二丈以下不堪大小就便賣銀來京其荊州所抽若是堪中數

少圖圓不及就將選退各色竹木并二丈以下松木變賣銀兩及查在官錢物着令三司委官同堂上官員兩平收買如有不敷於武昌府稅課司借抽一季湊數起運合用裝載船隻并水手等項爾等須公同各該巡撫等官設法奏置或將變賣銀兩量爲津助不許有司指以僉點殷實人戶爲名一槩勞擾有失人心其龍江茂屑埧蕪湖二處抽分木植板枋着落南京守備等官并南京工部堂上官委的當人員管押南京兵部差撥馬快船

隻裝運沿途軍衛有司及經過洪關但遇前  
項運到木植俱要添撥軍夫押送星夜催趲  
前來不許遲悞爾等到彼須相度事勢要數  
內仍有可于在京收買較之彼處工價反輕  
有益於民無損於官者聽爾等從宜處置具  
奏爾須持廉秉公禁約下人凡經過之處不  
許纖毫科擾致使嗟怨其各處木植查選明  
白措置亭當差去郎中先行回京仍令各該  
官司候事完之日備將起運過木植并價銀  
數目造冊奏繳以憑查考爾其如勅

旱災修省勅

成化十七年四月十六日

勅諭文武羣臣朕嗣承

祖宗大統十有七年恒宵旰圖治永求以上格

穹蒼下安黎庶無負付托之重柰自去冬陰陽愆期

雨澤少降朕心憂懼已嘗齋心露禱祭告

神祇遣官清理刑獄用弭災沴然而狂風大作塵霾蔽空

豈朕與爾文武羣臣修省有未至耶凡有関朕躬

朕自究循而行之不怠其爾等佐予治理中能修

職者固有曠職者豈無為勛戚輔導者或忠盡

未殫猷謀未盡歟司銓選錢穀者或出納未當

徵驗不時欺典禮樂戎兵者或不能和神人息邊  
患歟與夫掌刑罰工役任風紀言責握將帥戎柄以  
及巨細官守之寄者豈各稱委任而無竊祿者歟  
有一於此亦足以召災今後務加修省革其欺公之弊  
警其怠惰之習固庶慎不移之節各舉其職以輔  
朕不逮而政事修舉災沴可弭矣爾等欽哉故諭  
遣中官會審在京獄囚勅

成化十七年四月二十三日

勅諭刑部都察院大理寺朕仰承

祖宗鴻業為天下主惟法天道用刑以防奸慝以安生民簡  
命爾等典司刑獄各盡職業用輔朕之治理中間

有等或聽斷苟且而鞠問不明或議擬迎合而  
比附不當或任意妄爲出入或徇私恣爲輕重  
以致人罹冤抑淹禁歲久是以怨讟繁興有傷  
天地之和朕念及此情甚惕然已勅司禮太監懷恩同  
爾等審錄清理入夫旣往者悉不追究將來者  
豈不警省今後爾等大小官員務以欽恤存心  
明慎刑獄不可輕易淹滯可矜疑者即與辨折  
有冤抑者即與伸理毋過於姑息毋失之慘刻  
庶幾刑罰得中人心協從足以副朕治理用召  
天地之和矣倘不此之務使刑罰枉濫害及無辜則國

有常典罪有可逭耶爾等其欽哉諭

遣官審錄在外獄囚勅

成化十七年四月十七日

朕惟刑獄重大事也一或失當必乃累災沴古

先帝王未嘗不致謹於斯朕爲民主仰體

上天好生之德每於刑獄加寬恤焉茲者天氣不和

雨澤少降慮近心累民罹法多自寬抑不無故傷

天地之和今特命爾體仁行順審錄見監問罪囚其

在三司者爾等即會同監察御史三司掌印

官從公審錄在外府州縣衛所者御史同布

按二司分巡分守官親詣各處逐一審錄其

死罪果情真罪當應決者照例監候聽決其  
有情可矜罪可疑事無証佐可結正者一  
具奏處置徒流以下便減等發落毋令遲滯  
審問之際尤須詳察言詞旁詢知證而斷之  
以理毋惑於浮言毋拘於成案毋偏信原問  
及原保結官吏飾非阻撓務得實情以全民  
命其故失入等罪俱免追究敢有偏執違拗  
者聽爾行并巡按等官各照所審指實奏  
爾等受茲委任務要持廉秉公明以決之恕  
以行之俾無冤抑斯稱朕好生之意而



天心可格災沴可彌矣如或詢察不明處失當有  
負任使則爾等之罪可追乎哉欽之故諭

賜晉王書 成化十八年四月十七日

皇帝致書

叔晉王該爾府永和王儀賓劉欽奏要將自己故東  
滕縣主收貯折色鈔貫及未支祿米四百石  
并自己合得祿米二百石俱辭入官以爲軍  
國救荒之需止留一百養贍終身等因事下  
該部議得查無事例朕惟欽此舉三失存焉  
王大府所屬郡王將軍儀賓官員人等凡有

所事例該啓之而行茲欽專擅差人奏擾其  
失一也縣主既沒祿米自有司截日住支何  
勞欽言以掠微羨其失二也又連年饑饉朝  
廷西顧之憂無時或已舉一方之徭役糧草  
悉停不徵措置鉅萬之銀物尚極勿足而欽  
纖芥之祿何濟欽意必自謂我此舉上可以  
動九重之知下可以得衆人之喜沽名釣譽  
炫耀誇張其失三也此三失之外或有非義  
隱匿于中亦有未知書至王即拘欽到府責  
以前失薄示誠懲令其改過自新安分守已

讀書循理自有樂地何必爲是矯激虛語哉  
不然豈惟欽擅奏之罪尚在而王失於防範  
之罪亦不免矣願書以達惟

王亮之

戒諭晉王勅

成化十八年九月初一日

勅

茲者鎮守太監劉忠并巡撫等官奏慶成王  
府竒澗抗拒父命打死平人姦占樂婦飾詞  
奏擾并軍校尉胡紳等同謀加功撥置爲惡  
等因事該法司據奏將胡紳等依律從重問

罪結矣特遣司禮監右少監孫端賫勅前去  
會同劉忠詣府處置王即日召拘慶成并奇  
澗至府令其望闕跪伏數慶成以下不能數  
子之失不啓不奏之過夫爾祿享千石之多  
位處臣民之上法令不行于家何以表率乎  
衆不有玷宗室乎數奇澗以前項罪惡謂他  
事且已爾前次打死朱閔今又打死盧順彼  
雖賤役亦人命也騁無忌之怒殲二命之苦  
興一方之怨譴傷天地之和氣未必不由於  
是且爾父何人爾敢置教言如不聞發賴言

以挾制以成法論之當加不孝之典夫前死者固賤於爾而父乃尊於爾爾於上下之間無禮無義如此何止有玷宗室數訖諭訖降爲庶人眼同端忠打發竒澗行李并合帶人口遣本府內外官員管送祖墳所安置俾朝夕侍奉香火此外務須安分守已讀書習禮改過自新不許他往若再生事端王即具實奏來通前所論悔無及矣於戲乃父乃子固可責也王乃一府之長親親族於秦越而不加之意可無責乎但薄乎云耳省之審之故

諭

地震修省勅

成化二十年正月初四日

勅諭文武羣臣朕仰承

天命祇紹

祖宗丕緒夙夜兢惕圖惟政理然治効未著地震京

師

上天爾戒可謂至矣朕齋心條慮省愆修德所當自

勵恐事神治民安內攘外之道有所未盡爾文

武羣臣與朕共天職者其間豈無私勝公微

竊位苟祿怠事玩法辜負任使以召至災咎

者乎自今宜各痛加修省改過自新懋稱厥職以毗朕懷以回

天意以底于治平庶盡上下交修之誼今特以合行事宜開具于后爾等其欽承之故諭

一各處嶽鎮海濱太常寺差人齎香帛致祭

一各處貢獻除年例外其自成化二十年正月為始以三分為率減止二分

一京營并大同宣府延綏寧夏遼東等處常有虜寇窺伺便寫勅着鎮守官上緊整飭兵備以防不虞

一在外各處修造多累損軍民俱停止以甦人困  
一內外法司今後問理刑獄務要從公毋得徇情出入人罪有乖欽恤之意若有見監囚犯果有冤枉即與辦理

一開辦銀課地方艱難民力不堪之處戶部查出量為減免

一各處燒造勞費財力工部查勘有無勾用應否停止來說

一南北直隸等處地方因追徵逼迫價值倍增民多嗟怨其重派已未完者兵部通查來說定奪



一夫同陣亡官軍餘優恤外每家再給銀一兩  
星變求言勅 成化二十一年正月初四日  
勅諭文武百官茲者

上天垂戒災異迭見去歲暮并今正旦星變有聲如  
雷朕甚驚懼惟天道與人事相為流通必人  
事乖違斯天道不順爾文武百官皆與朕共  
天職者而五府六部都察院大理寺通政司  
堂上官六科十三道官付託尤重凡一應弊  
政及有利於國家生民之事其各指實陳奏  
無或顧忌朕當求而行之用回

八意故諭

星變寬恤詔成化二十一年正月初七日

奉

天承運

皇帝詔曰朕紹

祖宗大位撫育萬方負荷之難罔敢自逞自豫然而  
治効未著災沴迭興地道弗寧天時亢旱士  
民無所朕切憂惶嘗齋心懇禱遣廷臣祭告  
山川柰歲竟不登而河南山東畿內率多饑  
饉陝西山西尤劇至有棄恆產室家不相顧

者元元何辜罹茲危阨朕爲民主可忍然莫  
之懲耶累博采群議發內帑倉儲勅所司大  
小多方賑濟期此之人咸歸樂土不意冬盡  
春初兩次星變有聲朕愈兢惕再勅廷臣備  
陳時政得失采納而行以下慰民望上答  
天心况方春和時萬物發育祗承乾元資始之心誕  
敷寬恤天下之典合行事宜條示于後

一自成化二十一年正月初七日昧爽以前官  
吏軍民人等有犯除謀反叛逆子孫謀殺祖  
父母父母妻妾殺夫奴婢殺主謀故殺人盜

毒魘魅毒藥殺人強盜妖言黨惡人命失職  
不赦外其餘已未發覺已未結正罪無大小  
咸赦除之敢有以赦前事相告言者以其罪  
罪之

一文武官吏監生生員知印承差將軍力士旗  
校軍民匠作舍餘人等有爲事見發立功哨  
瞭運磚運炭運灰納米納料拘役擺站做工  
充儀從軍伴膳夫煎鹽炒鐵等項悉皆赦免  
各還職役肄業軍還原伍匠仍當匠民放寧  
家文職官吏監生生員有犯貪淫暴酷武職

有犯敗倫傷化及爲事脫逃例該革職爲民  
及帶俸差操者悉照原擬發落其有犯強盜  
處決者不分在京在外子孫不許承襲俱調  
邊衛充軍庶人知警戒

各處司府州縣衛所地方週年各有災傷輕  
重不等成化十七年以前拖欠稅糧馬草農  
桑屯種糧草採打荻青草束力口鈔貫鹽課  
茶課魚課商稅課程折糧顏料買辦厨料等  
項一切取辦於軍民未完者悉皆宥免果有  
已徵在官者照舊送納其陝西山西河南鳳

翔延安慶陽平涼臨洮鞏昌平陽河南淮慶  
開封南陽等府及澤州并直隸大名府係災  
重去處各衙門該徵成化二十年以前糧米  
未徵并災傷去處勘實量徵者盡行蠲免已  
徵者見數就留本處賑濟

一浙江福建雲南四川煎辦銀課成化二十年  
以前未完者每年俱減三分

一各處一應額辦坐派物料除軍需外其拖欠  
皮翎觔鯨硃漆油麻銅絲鐵線施子槐花烏  
梅藍靛翠毛野味箬葉圓藤芒苧苕黃穰

稷草荆條竹楷麥穗稻皮松香沙葉葶麻茜  
草杉松榆槐檀椴等木猫筆長節水苦等竹  
軟篾板枋白硝雜板驢皮前截羊毛羊角水  
牛底皮黃真牛皮水和炭煤炸柴炭瀝沙土  
硝磁末毛纓白猪鬃雲母石瓶鐔高頭等紙  
缸礮等土油椿磨板黑鉛銅鐵金箔青綠顏  
料等項自成化十九年十二月以前未徵者  
悉皆蠲免已徵者仍令起解該部另各項收  
貯准作下年之數不許內外衙門朦朧再奏  
追徵敢有已徵捏作未徵者治以重罪

一在京各管在外各邊衛騎操馬疋并南北直隸河南山東被災去處軍民孳養馬疋自成化二十年十二月以前一應倒死虧欠等項并有例停候買補者所司查勘明白災傷重處悉皆蠲免輕處自成化十六年十二月以前之數悉免追賠其餘停候二十一年夏秋成熟陸續繳解如或該管上司及各府州縣管馬官吏交通作弊事發問罪黜職

一陝西山西河南三處該派成化二十二年

大祀牛羊以十分爲率俱免七分派納三分陝西



西該應大尾羊縣羯羊除成化二十二年上半年分停徵外其下半年及河南二十一年分猪羊鷄鵝以十分爲率停免七分追徵三分該免七分之數禮部俱移附近產有地方派納該徵者仍各於本布政司災輕去處派納

一陝西山西河南災傷軍民有全家逃往隣境南山漢中徽州商洛并湖廣荆襄四川利順等處趁食求活者情實可憫各該巡撫巡按三司府州縣衛所官不許趕逐務要善加撫

恤設法賑濟安插得所候麥熟官爲應付口糧復業免其差糧三年本處官司不許科擾及追逼私債

一陝西山西河南極災地方俱有盜賊生發或至拒捕傷人詔書到日除首惡外其餘限三箇月以裏許自首免罪軍還原伍民歸耕種所在官司仍量爲賑濟如限外執迷不服招撫者聽各鎮守巡撫等官擒捕

一山西成化二十一年分該徵柴炭價銀全免一年山東北直隸量免半年內外衙門年例

應供柴炭以十分爲率暫免三分其成化十九年十二月以前被人駢拐銀兩負累死亡逃竄及監追未完者該部改派另項收貯以備別用今後柴炭止依正價派辦分外不許多科違者許巡撫巡按官員奏來俱坐贓論一惜薪司各處擡柴人夫易州廠採運軍夫人等自成化二十年十二月以前拖欠在逃病故缺工及違限罰納柴炭者悉與寬宥其各色尖班人匠俱免罰工止當正班以蘇民困一在京在外上操做工爲事等項及近在逃官

軍自詔書到日爲始限三箇月以裏在京赴  
兵部在外赴所在官司首告與免本罪復還  
職役及該班來遲亦免究問今後一切不急  
工程悉皆停止以甦民困

一天下衛所歲造軍器弓箭弦條自成化十九  
年十二月以前拖欠未完者悉免補造其收  
過有司物料准作以後年分該辦之數敢有  
因而侵欺者治以重罪

一杭嘉蘇湖松等府自成化二十年十二月終  
以前除歲造紵絲紗羅紬絹綾等項外其內

外衙門奏准差人前去坐守織造者詔書到日暫停三年已織完者照數起解已徵料者交與所在官司准作歲造之數差去內官人等即便回京違者罪之

一神木廠苦蓋木植人夫逐年分派順天府所屬州縣出辦工價深爲民患并慶豐等閘夫今後以十分爲率俱留五分看守其餘放免一南京工部成造馬槽馬椿等項俱係粗重之物沿途軍民運送不勝勞擾詔書到日悉與停止以後缺用在京衙門照數成造不許違

誤

一茶鹽之利國有所資近年以來招商不肯上中皆因勢要之家撓支撓買及夾帶私販侵奪其利今後開中茶鹽不許勢要及內外見任官員之家上中及夾帶販賣侵奪民利違者治以重罪茶鹽入官

一各邊軍儲各處賑濟山西河南王府一切祿米有因今次寬恤目前支用不敷將來無所收給者戶部會計處置來聞事有難處即會多官計議務要各陳所見將可責近効期於

必行事由開坐定奪毋或推避虛應故事

一軍衛有司預備倉糧有例見行官吏人等奉行不至多無成效今後軍衛每一百戶所有司每一里務要措置或勸借等項各以二千石爲額驗時豐凶歛散年終常要將額數收除實在數目開奏有能多積至一半或兩倍者量加旌擢巡按分巡分守官員時常往來督理

一在京在外官吏軍民人等自成化十九年以前有爲事追賠還官給主一應贓物監候年

久不得完足者悉皆停免釋放其各處官攢人等有因查盤糧草腐朽浥爛虧折數多問罪監追者果無侵盜情弊亦皆免追

一妖言人犯例該全家發煙瘴地面充軍但中有族屬踈遠各籍另居事無相干者一槩發遣情有可矜所司查審果係各籍另居者悉皆放回今後有犯重罪合全家充軍者除謀反大逆不限籍之同異外其餘異籍另居者並與分豁

一在京各衛帶俸軍職數多有情愿告選外衛



者指揮僉事以下許赴兵部具告銓除缺官  
衛所聽巡撫巡按等官量材委用

一各處清理起解軍犯違限一年之上軍發邊  
衛解人發附近衛分充軍者軍人仍還原衛  
解人寧家陝西山西河南地方饑荒該解查  
補軍伍暫且停止待年豐查解補伍

一在京官員軍民人等之家衣服飲食奢侈僭  
用不無濫費財物禮部便查例禁約

一各處鎮守內外等官貢獻方物悉照天順三  
年以前例行不許因而科害軍民及沿途往

來騷擾致人嗟怨

一勲戚勢要之家不許霸佔關廂渡口橋梁水陂及開設舖店販賣鈔貫抽要柴草勒捐擺渡牙保水利等錢侵害小民違者許巡城御史并該管地方官員捉拏叅奏

一內外法司問擬囚犯有經五年之上者累次鞫訴究枉累勘不服情有可疑者所司審實合辯問者從公辯理如或干連人逃躲事難決斷與人命無屍可檢強盜賊物不明及年久無賊人死無証者原問衙門備開矜疑緣

由具奏定奪其都司衛所問擬囚犯宜從巡按御史并按察司分巡官審實具奏不許坐視不理違者罪之

一法司問完囚犯枷號者悉免枷號俱照例釋放中間有依旨發遣充軍者仍具奏定奪

一河南山東北直隸被災處所凡民間詞訟戶  
婚田土債負等項不分遠年近年之事應提  
人對理者今當饑饉及農種時月官司與明  
立文案將原告知証候秋成之日提對發落  
不許一槩勾擾監禁妨民生理

一 内外文武官總小旗有因事住俸糧照舊關支  
一 朝廷政事得失軍民利病許諸人直言無隱  
於戲君以愛民為德懷保惠鮮之政當施臣以輔  
治為忠綏定安集之務宜勉必上下極交修之誠庶  
穹蒼有昭假之效詔告中外咸使聞知

選 東宮妃配勅 成化

勅諭禮部

皇太子年及婚期宜慎簡賢淑以為之配爾禮部具  
榜諭北京直隸南京鳳陽淮安滁州河南山東於大小官員民庶之家用心選求務擇其

父母行止端莊家法整齊女子年十四至十七容貌端潔性質純美言動溫恭咸中禮度者有司以禮令其父母親送赴京欽哉故諭

上

皇太后尊號詔

成化二十三年四月十九日

皇帝詔曰朕惟自古帝王之孝親匪惟養以天下而必尊以鴻名蓋所以表功象德顯於今而垂於後也情文咸具敢忘祇敬恭惟

聖母皇太后夙贊

先皇茂隆內治誕毓眇質績紹丕圖迄今二紀宗社

奠安海宇寧謐寔皆

所母深恩洪慈訓迪所致矧以皇太子勤劬長育用庠

成室家攸宜國本深固凡茲勲德超軼前王

尊崇之禮尚未加隆朕心歉然乃稽羣典率

籲臣工以今月十七日謹奉冊寶上尊號曰

聖慈仁壽皇太后仰酬罔極之恩遠追帝王之孝禮既成

於家國澤斯溥於寰區所有合行事宜條示于后

一宗室為庶人者各賜米十石絹十疋其女子各

賜米五石布五疋年及婚配者所司具名以聞

照例選婚量助嫁娶之資俱令有司辦給

一軍民之間有年八十以上者不分男婦有司

給與絹一疋綿一觔米一石肉十觔九十以上者倍之其八十以上為鄉里所敬服者有司勘實加以冠帶以榮終身

一軍民之間有年七十以上者許令一丁侍養免其雜泛差徭無丁者有司時加存恤母令失所

一內外官員有父母在家應分祿助養者准令分祿於原籍閩支

一兩京文武官員未闕誥勅者七品以上至四品若父母見在先與誥勅封之三品以上賜與應得誥命不為常例

一在外軍官老疾有不能任事告替職者准令男兒赴京替職免其自來

一在京文職以禮致仕五品以上年及七十者進散官一階其中庶貧不能自存衆所共知者有司仍每歲給與食米四石以資贍養不許徇情一槩濫給

一各王府官員年老愿致仕者進散官一階其歷俸三年以上父母見在該授封者給與誥勅封之不爲常例

一將軍年及五十歲侍衛二十年以上者不拘



在役退閑俱與冠帶以終身

一兩京文職有離家六年之久欲照例給假省親查無違礙許其歸省

一吏部給由等項聽選官取選未到愿告致仕者俱陞職一級致仕監生不愿出仕者已有授職事例今後還填註衙門給與散官吏員冠帶聽選愿告回家不仕者照資格填授衙門職名閑住在原籍者俱令各該司府衙門告勘給授仍類冊繳部以憑查考

一監生家貧親老愿充教職者已有事例其遇

例入監應就教職者亦許一體考授其在學廩增生員有因親老無人侍養願告侍親者聽親終方許復學累科不第年六十以上願告罷閑者聽仍免本身雜泛差役

一兩京陰陽醫生有年六十以上不能供役願告回家者審實放回其軍匠厨役人等有老疾者亦許告替俱免其雜泛差役

一在京在外有孤老殘疾不能生業者即便收入養濟院照例給與衣糧已收者仍賜米二斗

一各處僧道有父母見存無人侍養者不問有無度牒許令還俗養親

一孝子順孫義夫節婦有司其實跡奏聞以憑旌表其已旌表年及六十者冠帶榮身節婦八十者照八十以上例給與絹綿米肉

一詔書內優老恩典有司務從實遵行不許虛應故事

於戲據古尊稱式廣親親之教揆今卹下誕敷老老之仁詔告中外咸使聞知

旱災寬恤詔  
成化二十三年五月利七前

皇帝勅諭文武群臣

朕以涼德嗣守鴻圖夙夜警惕共期治理奈上天示戒亢旱踰時田苗枯槁民庶驚惶朕甚憫焉已嘗寬恤刑獄徧禱

神祇而雨澤未降豈寃抑未伸財用未節困乏未蘇而致敷爾百官奉公守法之心懈而罔上厲下之私勝歟該朕省躬自飭撙節用度數放宮人及條示合行事宜條令內外衙門從實舉行爾等其各體朕心痛自修省盡心職業務致實効以回天心蘇民困以紓朕憂憫之

意其欽承之故論

一該部查文武官員罰俸緣由具實處置

一在京文武官爲事問發充軍爲民緣由開具來說

一兩京大小法司見監輕重囚犯情罪有可矜疑從實具開來說

一各處內外鎮守官貢獻除常例外其餘不急之務暫且停止

一在京官員軍民之家一應齋醮及冠婚喪祭服飾悉從禁約不許奢侈僭用違者治罪

一各處輪班京操官軍有因災傷來遲的都免問罪速營補操

一淨身人見發各處充軍該衛起送赴部發南  
海子種菜

一各營官軍倒死騎操馬匹并民間買補四戶  
馬該衙門都查數來看

遺愛修省勅 成化二十三年七月二十

三日

朕承天序以守

祖宗大業夙夜圖惟求以克享

人心然望道未見治効未著今年地載失寧乃六月十五日雷震于南京午門

之示戒可謂至矣詩云敬

天之怒易云將雷震以恐懼脩省朕是用齋心將慮  
內求已過蓋中和未足以格鬼神誠敬未足以孚  
幽顯脩齊治平之功未足以安中國服遠人敢忘勉  
勵以彌災異咨爾在廷文武群臣與朕共天職其間  
有謀謨是贊勲戚是聯司鈐衡以清庶位均賦役以  
理萬方典禮以

事

神天治兵以靖華夷明刑罰守章程掌風紀任言責  
與夫握將帥軍旅之權分鉅細官職之寄者  
固或能舉厥職矣然豈無竊位苟祿充塞賢  
路以玷朕之任使者乎又豈無懷私徇利欲  
成溪壑未達朕之聰聞者乎怠而能勉過而  
能改知止足而能退朕所與也以副朕志以  
回

天意以底于雍熙是爲君臣交脩之道欽哉故諭

遺詔 成化二十三年八月二十二日

奉



天承運

皇帝詔曰朕以菲薄紹承

祖宗丕業二十有三年矣宵旰憂勤圖臻至治惟恐  
有孤

先帝付託今忽薨疾彌篤殆弗能興夫死生常理姑  
今人所不免所幸繼承得人

宗社生民有賴吾雖棄世亦復奚憾焉皇太子祐  
聰明仁孝德器夙成宜即皇帝位中外文武  
群臣其協心輔理凡內外事一依

祖宗舊制而行用副予志喪禮

一考遺制以日易月二十七日釋服無禁音樂嫁娶  
宗室親王藩屏維繫毋輒離封域各處鎮守總兵  
巡撫等官及都布按三司各固守疆境撫安  
民軍不許擅離職守聞喪之日止於本處哭  
臨三日進香遣官代行廣東廣西四川雲南  
貴州所屬州縣并土官及布政司南直隸七  
品以下衙門俱免進香詔諭中外咸使聞知

皇明詔令卷之十六